

17608

METASTASIO

A LA CONCIARIA

ZOÈ

L' ARTASERZE

ACCONCIATO A USANZA NOSTA

DA LO BARONE

MICHELE ZEZZA.



NAPOLE

DA LI TRUOCCHIE DE LA SOZIETA' FELEMATECA.

1854.



Metastà! tu sì stato stroppeiato

Da tant' e ttante cuommece a sso munno :

Li maste de cappella ,

Iocanno d'ancarella ,

T' hanno puosto a lo lietto de Procusto ,

E cchi t' ha d' ogne banna stennecchiato ,

Chi muzzo e cchi allongato.

Vogl' io pur' acconciarte pe le ffeste ;

All' urtemo , la ggente che po dicere ?

Ca no barone ha rotte le ccostate

A lo cchiù addotto , e pportentus' abbate.

PERZONAGGE.

ARTASERZE. Prencepe, e ppo Rre de Perzia, Ammico ntrinzeco d' Arbace, e nnammorato muorto de Zemmira.

MANNANA. Sora carnale d' Artaserze, e nnammorata d' Arbace.

ARTABBANO. Prefetto de le Gguardie Riale, e gnore d' Arbace, e de Zemmira.

ARBACE. Ammico d' Artaserze, e nnammorato de Mannana.

ZEMMIRA. Sora carnale d' Arbace, e nnammorata d' Artaserze.

MECAMPISO. Cennerale dell' arme, e ccazzetta co Artabbano.

*La commedia s'appresenta dint'a la cetà
de Susa; Palazzo Riale de li Rri de
Perzia.*

ATTO PRIMMO

Ciardeniello murato mmiezo a lo Palazzo de lo Rre de Perzia, che sponta a cchiù de n'appartamiento. Veduta de lo Palazzo. Notte co lluna chiena.

SCENA PRIMMA

Mannana , e Arbace.

Ar. **S**tatte bona , Mannà.

Ma. Che pressa tiegne !

Ar. Prencepessa aggarbata , è fatto iuorno ;

Dà voce lo fornaro ,

Strilla l'acquavetaro : e si trapila

Pateto ch'aggio rutto lo mannato ,

E ccà me so mpizzato ,

Sibbè tu le sì figlia ,

Ed io l'avesse fatto

Pe lo cecato fauzo de Copiddo ,

Pigliannoce pe rrazia pe duie pazze ,

Farrà iocare lo triunfo a mmazze.

Ma. Tanto male non dice , core mio ;

Ma non pigliare curia pe ttaverna.

Lo gnore che t'ha ditto ?

Ca tu vocasse fora

Da sso palazzo schitto ,
 Ma no dda la cetà : statte a mmalora
 Donca dint' a la casa. Io chiss' affare
 Tanto scuro non beco : è ccarne ed ognà
 Pateto co lo Rre ; comme vo isso ,
 Esce , e trase da cca. Lo frate mio
 È tutt' uno co ttico ; e ppeccerille
 Magnavevo a la scola
 Nzembra le mmarennelle. Li sordate
 Vanno pazze pe tte : li paiesane
 Se levano nfi nterra lo cappiello.
 Ntra tant' ammice nce sarrà quaccuno ,
 Che faccia lo paglietta ,
 E sta causa a defennere se metta.

Ar. Tiempo perduto. Frateto ammoruso
 Farne bene vorrà ; ma è testemmonio
 Cchiù sospetto de tata : le rraggiune
 Che potranno contà non so credute ;
 Pocca (lo ntienne , senza che lo ddico)
 L' uno è lo gnore mio , l' auto l' ammico.
 Va te pesca l' ammice de cappiello !
 So hbannere che botano la faccia ,
 Comme vota lo viento. Oh quante e quante
 Che primmo me faceano vasamane ,
 Mo ncontrannome sulo
 Se votano a gguardà da n'ata vanna !
 Che donca aggio a sperà , no chiappo ncanna ?
 S'io non allippo priesto ,
 Tu nce passe no guaio ,

Io nce pozzo caeà le ppera cotte :
 Tu , pecchiè Serze te darria nconzegna
 A cciento sentenelle ; io pecchè sempre
 Trovannome addò staie ,
 Avria a sperì , senza vederte maie.
 Pocca non esse nato
 Da regina , e da rre pe mme è ppeccato ,
 Voglio nnogne manera
 O crepare , o sposarte ; e hbona sera.

Ma. Fedè d' aluzzo , e comme tiene core
 De lassarme accossì ?

Ar. Fedè d' aluzzo
 È pateto , non io : isso , isso fete
 De scannato , ch'appesta.

Ma. E ppuoie niare ,
 Mettennote la mano a la coscienza ,
 Che tata non ha tuorto a non nce dare
 Lo consenso a le nnozzole ? Lo munno...
 Mo nc'è vole... lo paro para piglia...
 E ppo , chi sa?... na zingara potria
 Nnevenà si lo gnore
 Usa apposta , o da vero sso regore.

Ar. Potea però mpararse
 Meglio lo Calateo ; me potea dicere :
 Figliama n'è pe tte ; ma non già darne
 Duie , tre cauce da reto , e ddechiararne .
 Bazzareota , sguessa ,
 Cornuto , mmerdusiello... Ah , prencepessa ,

Sti mutte de lo gnore
 Fuieno lanze a sto core !
 È lo nnascere gruosso
 Varrata de cecato
 Menata da la sciorte: e Mmicaria
 Si chesta causa se mettesse a rruolo
 Ntra Serze, e Arbace, e agnuno
 Potesse dì po le rraggiune soie,
 Fuorze farriamo, prencepessa bella,
 Lo vero iuoco de *Commà Setella*.

Ma. Compà! co ssa crianza

Tu parle de lo gnore
 Nfaccia a la nnammorata?

Ar. E dopp' avuta
 Sta sciorta de schiaffone, è grà rispetto
 Lagnarme schitto.

Ma. Agge pacienza, Arbace,
 Tu non me faie capace: e tant' arraggia
 Me fa ascì da li panne: e comme! puorte,
 Qua nzalata mescata, int' a lo core
 Odio a lo patre, ed a la figlia ammore?

Ar. Mannà, refriette buono;
 St' odio d' ammore è ssigno,
 È d' affetto sso sdigno, è pecchè ppenzo
 Che co na funa ncanna aggio a llassarte,
 Pe rrevederte fuorze all' auto munno.....
 Ma tu chiagne? Ah ca senza
 Sso chianto io già sconocchio!

Va lassame partìre ; e tu ntramente

Peo de chillo de Serze

Haie da fa core d'urzo ,

E ffenimmo a mmalora sso trascurzo.

Ma. Va chiano ! e chi se fida

De vederme lassà ? me ne tras' io ,

Bonni.

Ar. Mannana , arma de s' arma , addio.

Ma. Va , ma coll' ora bona ;

Penza ch' io t' ammo , o caro ,

E ppenza a lo mmacaro

Quacche tantillo a mme.

Toccannom' io lo core ,

Ddò t' ha pittato Ammore ,

Me pararrà mpersona

Chiacchiarià co tte.

SCENA SECONNA

*Arbace , e ppo Artabbano co na sferra
nzanguenata mmano.*

Ar. Oh commanno ! oh spartenza ! lo scrastarmè

Da ssa nenna aggarbata

La vocca de lo stommeco me nzerza ,

E mme sento chiavà de faccia nterra.

Art. Arbà !

Arb. Signò !

Art. Damme la sfera toia.

Art. Eccola ccà.

Art. Pigliate mo la mia ,
Mitte le ggamme neuollo ; e cchillo sango
Nascunne a tutte.

Arb. Canchero ! d'acciso
Chist' è ssango.

Art. Vattenne , cca po tutto
Pe filo saparraie.

Arb. Ma , tata mio ,
Chessa faccia cchiù gialla de no muorto ,
Chist' uocchie spererate
Tremmà suoccio me fanno.

Art. Sì ccontento?
Aggio Serze scannato.

Arb. Arrassosia !
Vuie decite davvero , o pazzeiate ?

Art. Serze te fice chillo perro ? e ad isso ,
Pe tte che me sì caro ,
St' azione fic' io de crapettaro !

Arb. Pe mme ? chest' a la fine nce mancava :
Dalle , Tentillo , comme disse nterra.
Mo che sperate ?

Art. Tessere na tela
Meglio de la battista. Tu sarraie
Lo rre : vattenne , che mo cca song' io
Cchiù necessario de lo nnecessario.

Arb. Io non tengo cchiù capo.

Art. E non t' abbije ?

Arb. Cielo!

Art. Te ne vuoic ì?

Arb. Gnorsì : mo moro.

Chiss'è gghiuorno de festa , o de lavoro ?

Lo sango va a lo core ,

Scenne la lengua ncanna ,

E tremmo comm'a ccanna ,

E sto p'arrotecà.

Penzo a li strille e cchiante

De nenna bella , e ppenzo

Che sciorta de birbante

Patremo è fatto già.

SCENA TERZA

*Artabbano, po Artaserze, e Mecampiso
co li sordate de guardia.*

Ar. Anemo e ccore : mo nce vo , no passo

Ne porta cient'e cchiù: ntra Romma e Nnapole

Non nc'è pco che fermarse

A Torre Meza Via. Vaca mo proprio

Tutta de Serze la streppegna a ddiavolo.

Nè tremmare me faccia

St'azione corta. Atta de craie matina!

Non è pietto de tutte

Fa ste ppenzate : fragnerse lo core ,

Sentì li cane neuorpo , avere a bbista

Lo' boia lesto , e farse na risata,

So bertù necessarie a ccheeste mprese,
Comme l'ova e lo sciore a la frittata.

Vecco Artaserze: attiento.

Che strille! che fracasse!

Che revuoto! Signò, state scetato

Primmo d'ascì lo sole?

E cchill' uocchie, uh mmannaggia!

Ve sghizzano de lacreme, e d'arraggia.

Art. Buono, Prefetto mio, che t'aggio asciato:

Conziglio, aiuto, federtà, vennetta.

Ar. Io tremmo, Autezza mia, comm'a na foglia:

Parlateme cchiù cchiaro,

Ch'io sto comm'a no ciuccio ntra li suone.

Art. Patremo sta scannato

Dint'a lo lietto.

Ar. Bagattella! e comme?

Art. E cchi lo ssa? sta notte

Quacch'anema de pece

Pe ppuorco l'ha pigliato;

Va te pesca chi è stato!

Ar. Che sije mmardetta, voglia de regnare!

Co tte non hanno niente

Nè ammicce, nè ccompare, nè ppariente.

Art. Artabbà, t'aggio ntiso:

Chillo gioia de fraterno,

Dario fece la botta.

Ar. E cchi poteva

Ccà mpizzarsc de notte? e ppo trasire

Dint'a l'arcuovo, addò dormea ronfanno

La Maistà bonarma? Arraggia vecchia,
 Pessema ntenzione,
 Golio de prena de regnare a fforza....
 Signò! la vita vosta
 Non ba no callo, o penzate a la vara,
 O aprite l' uocchie: cchillo
 Ch' à fatto no vernacchio,
 Ne senta duie: coglienno chisso piro
 Ch' è fraceto ammaturo,
 Vennecato sta Serze, e vuie securo.

Art. Ah si nec sta quaccuno
 Ch' aggia piatà de patreino scannato,
 Che refretta a sta sciorta de delitto,
 E cche ammico me sia, zompa mo proprio
 A llevà chillo mpiso da lo munno.

Ar. Oè, sordate, sentite, o non sentite?
 Mo ve parla no figlio,
 No prencepe riale, e, si volite,
 Sua Maistà mperzona. A sto momento
 L' obbedienza facimmo: io vaco nnante,
 Venit' appriess' a mme quante cchiù site.
 (Comme cocozza canta,
 E ppe mme la Fortura tutta quanta).

Art. Va chiano! vi che pressa! e si gnopatre
 Se nzorfa cchiù ch' accido lo fratiello?
 Vi ca chillo l' è figlio?

Ar. E ancor' è figlio
 Chi ha mannato lo patre
 A cchill' aute cauzune?

Cheste so le piatà fora stasciune.
 Sciso a Llete , mmarcarse non bole ,
 Ma s' assetta ,
 Cercanno vennetta
 Chillo gioia de gnore , e de rre.
 Vì la faccia ,
 Vì comm' ammenaccia ,
 E lo sango echiù niro de gnosta
 Llà ve mosta , che vuosto pur è?

SCENA QUARTA

Artaserze , e Mmecampiso.

Ar. Vi che vittema manno a lo maciello!
 Mecampì....

Me. Chisti songo scrupolicchie:
 Accossi vuie facite, Autezza mia,
 Na botta, e doie focetole; scannate
 N' assassino de figlio, e buie regnate.

Ar. Ma lo munno sta cosa po pigliare
 Pe ccortiello a duie taglie,
 Zoè, ch'io l'aggio fatto pe regnare:
 Sto penziero me ntosseca
 Tutte li iuorne mieie. Priesto, mo vaco
 A rrevocare lo decreto.

Me. Autezza ,
 Scetateve , ch'è ghuiorno; e alleccordateve
 Che ve fice sso frate: isso de vuie

Sibbè cchiù peccerillo ve nzegnaic

Ad essere lione.

Ar. È bella chesta !

Ed aggio a ffà la scigna

A cchi fete de chiappo ? Uno iastemma ,

Ed io iastemmo appriesso ? e si avastasse

Lo ddire a echisso munno

Pecchè Tizio l'ha fatto , io mo lo ffaccio ,

Chi birbante sarria , pe mme non saccio.

Me. Natura nce commanra

De sarvarce lo cuorio : isso v'accede ,

Si vuie non l'accedite.

Ar. Ammico mio

Nce sta Giove pe ttutte , e Giove penza

A non fa crevellà sso cuorio mio.

SCENA QUINTA

Zemmira , e Dditte.

Ze. Artaserze , addò vaie ?

Ar. Zemmira , addio.

Ze. M'haie pigliata pe n'orca , ca me fuie ?

Siente , sienteme cca.

Ar. Lasseme ire :

Non me fa' perde tiempo.

Ze. Che crianza

Nova de trinco co la nnammorata !

Ar. Ma si eo tte me ncanto ,

Manco all' obbreco mio pe ff'à l' ammore.

Ze. T'aggio ntiso, omimo ngrato, e tradetore.

Ar. Che ne vutte, gioia mia!

Io so ngrato, e tradetore?

So nguaiato, sissignore;

So nfelice, signorsì.

Ma si t' ammo, tu lo ssaie,

Lo ssacc' io, lo ssa lo munno;

E ssi ncielo puro vaie,

Te derranno: sine sì.

SCENA SESTA

Zemmira, e Mmecampiso.

Ze. Oh che tropea ch' assomma! Arbace frate mo

Primmo de iuorno allippa. Poco nnante

Ncontro armato a rrasulo

Lo gnore, e non me parla.

Artaserze lagnannose, me chianta

Comm'a ccarota. Mecampì, si saie

Che mmalor' è, dimmello: a lo mmacaro,

Pozzo dì comme dice lo tronaro,

Na botta, e bbona.

Me. Schitto tu non saie

Che nsuonno se pigliaie lo passapuorto

Serze pe ll' auto munno? e cche lo figlio

Dario l' accise? e ddinto a sso palazzo

Se sta mo p' appiccià no sparatorio?

Ze. Precepizio! che sento!

Mo ntenno la mmasciata.

Uh mmare nuie! mara la Perzia!

Me.

E bbuoie

Pe zzò piglià na malatia? che mporta

A te sso chiaito? e cche? faie tant'a pparte

Co li prineepe tu? fuorze aie paura

Ca nce mancano rri? penza a servire,

Che nc'è chi penza a ccommannà la Perzia.

È tutt' uno pe mme si nc'è Zempronio,

Tizio, Cajo, Martino, o lo demmonio.

Ze. Ma lo cuorpo patesce,

Si patesce la capo: e nuie vassalle

Scemià non potimmo. Io da te sento

Che no figlio s' allorda

De lo sango paterno; che Artaserze

Sta ncopp' a no cortiello: e cche borrisse?

Ch' io vedesse sto caso mmalorato

Comme se po bedè na scenolella,

Addò rirere fa Polecenella?

Me. Zemì! pe bbocca toia parla mo chiaro

D' Artaserze l' ammore:

Ma siente: o chisto vence

A fronte de lo frate; e stanno ntrono,

Vo pensà iust' a tte: o va da sotta,

E se po ncaparrà li schiattamuorte.

Donca sempe pe tte so cunte muorte.

Vuoie sentì no conziglio,

Ma conziglio de core? lassa ire

Chessa via che no sponta;
 E n'autro nnamorato
 Scigliete suoccio a tte. Saie che l'ammore
 Ioca a paro, e no sparo. E si volisse
 Mo approfittà de no conziglio mio,
 Cca nc'è lo core tuio; cca nce song' io.

Zc. Non nc'è che reprecà: chiss'è conziglio
 De dottore Manchella: ed io mo voglio
 Dartenc n'auto meglio, e cchiù ázzeccuso,
 E accossì stammo parapatta e ppace,
 Leva suono, compà, ca non me piace.

Me. E cchi se po fedare
 Vederte, e non amarte?

Ze. E cchi te forza
 Guardarme nfaccia? quanno nce ncontrammo,
 Tu vota vico, e trova
 Na nnammorata nova,
 N'ata figlia de mamma
 Che de lo core suoio core te chiamma.

Me. Ncienzo a li muorte. La bellezza toia
 Semp'appriesso me veco
 Qua usciere de Venezia: n'uso fatto
 Addeventa natura;
 E agnuno a cchisso munno
 Tutto zò che non ha, se lo ffigura.
 Nsuonno lo bigliardicro
 Vede li carambò;
 L'ache, e lo ffilo po
 Lo cosetore.

Quanno Fra Paolo vene ,
 Nsuonno vech' io porzi
 Chella che fa sperì
 St' affritto core.

SCENA SETTEMA

Zemmira sola.

Oh ddeie, che proteggitte
 Sto regno nnabbissato,
 A bbuié, quante cchiù site,
 Raccomanno Artaserze a bbraccia aperte.
 Ma penzo ch' io lo perdo
 S'isso resta da coppa, e bbence a Ddario:
 No core de vassallo
 Non è cchillo de rre.... Quanto so scema!
 La vita d' Artaserze
 Non bale donca lo trommiento mio?
 Va! ca pozza campà, pozza regnare!
 E ppo, doppo ch' io resto
 Co na vranca de mosche ntra le mmanc,
 Non me preme no cuorno. Isso stia buono,
 E cche sposa chi vole. Ah ch'io sarria
 Streca de Beneviento, si vorria,
 Pecchè non me lo piglio,
 Vederlo acciso! Chisse vute mieie
 Da lo cielo accoglite, aterne ddeie!

Lo bbolè perdere
 Pe tropp' ammore
 Tre quarte d' anema ,
 Mmità de core ,
 È caso barbaro ,
 Che fa piatà.
 Ma ntra le llacreme
 Sarria felice .
 Si po lo prencepe
 Sospira , e ddice :
 Che ppena a st' anema
 Zemmira dà!

SCENA OTTAVA

Palazzo Riale.

Mannana , e ppo Artaserze.

Ma. Addò vaco ? addò corro ?
 Addò sbatto de capo ? E chi da chisto
 Palazzo ch' è arredutto cemmeterio
 Me ne porta d' arrasso ciente miglia !
 Comme ? na sora , nnammorata , e figlia
 Se vede ntra pochi' ore
 Squagliare frate , nnammorato , e gnore ?
Ar. Ah Mannana !....

Ma. Fratiè ! che nova puorte ?
 Dario è bbivo , o tu puro t' allordaste
 De lo sango riale ?

Ar. Io , sora mia ,
 Carta ianca sarria ; ma lo dciavolo
 Me scippaie da la vocca
 No decreto de Nfierno : io nnissoffatto
 Friddo friddo restaie comm'a la neve ;
 E mmo vaco correnno
 Peo de mala moneta , e spio pe ttutto
 D' Artabbano , e de Dario ,
 E aspettannole sto coll' ova mpietto.
Ma. Iusto iusto mo arriva lo prefetto.

SCENA NONA

Artabbano , e Dditte.

Art. Signò !

Ar. Artabbà !

Art. Ieva trovanono a bbuie.

Ar. Ed io a tte.

Art. Fuorze paura avite ?

Ar. No poco.

Art. N'è cchiù tiempo de paura :

Lo nudeco a lo pettene è arrevato :

Artaserze è lo rre , Dario è scannato ,

Ar. Che dice ?

Ma. Oh me carosa !

Art. Presentaie

Isso stisso lo pietto a le sfarzine.

Ar. Cielo mio !

Art. Sosperate ?

E non distevo vuic sto perentorio ?

Ar. Ma nce potive fa quacche postilla ,
Nterpetrarlo cchiù meglio.

Ma. Sì: potive
Prevedè l' azione ch' era cortà ;
Ch' Artaserze pentuto se sarria.

Ar. Argomentà dovive
Ca no povero figlio
Che ha perduto lo gnore ,
Sproposete po di ntra lo dolore.

Art. Io non appe sto tiempo: li sordate
Iettero tanto lesto , ch' io vediette
Lo prencepe bonarma
Nnissoffatto nfegura , e nsepotura.

'Ar. Farraggio a st' assassine
E ppe ncoppa , e ppe bascio ascì lo spireto.

Art. E che nc' entrano cca cchilli scasate?
Vuie distevo la voce : fuoco , fuoco ,
E cchille llà sparaicno , Autezza mia.

Ar. Aggio tuorto , aggio tuorto :
Pe mme frate mo è muorto; io l'aggio acciso:
Io songo l'assassino.

Art. Assassino ? e pecchè ? pe na iostizia
Fatta proprio a cciammicello , e pe la quale
Contentone sta Serze all' auto munno ?
Non v' affriggite cchiù ; penzate schitto
Che co chillo *esequatur beneditto*
A mmorte avite miso
Chi aveva lo patre (oh che birbante !) acciso.

SCENA DECIMA

*Zemmira , e Dditte.**Ze.* Artasè , piglia sciato.*Ar.* Zemmi , fora stascione

Me pare sta resata che me faic.

Ze. Mo te dico na cosa che non saie.

Dario è mmozente comm' a na vammace.

Ma. Oh cche sento!*Ar.* Ed è ccerto ?*Ze.* È tanto certo ,

Ch' ànno afferrato lo mnecidiario.

Vecino a lo murillo

De lo ciardino , mmiezo`a li sordate

Ncappaic lo paesano ,

Comme ncappa goluso sorecillo

Dint' a quacche trabbuco , o a qua mastrillo.

E le iurano nfaccia sto mmecidio

Chillo luoco sospetto , lo ffuire ,

Lo ttartaglià confuso , chella cera

Che dice : Va m' atterra ,

E allordata de sango chella sferra.

Ar. Chi diavol' è ?*Ze.* Non saccio : a fmanca , e a rritta

Fanno tutte co mme li secmiature.

Ma. (Mo vi ca chiss' è Arbace ncarne , ed ossa.)*Art.* (Bona notte , Artabbà , a li sonature.)

Ar. Ah frabbutto song' io fora misura !

E mme ne saglio ntrono

Co na faccia de cuorno ,

Spuorco de sango de nnozente frate ,

Nn'odio a ttutto lo munno, e fora munno?

Ze. Che ? fosse muorto Dario ?

Ar. È mmuorto, è mmuorto!

E sto frate l' accise.

Nfi ch' arrivo a le ppose de la morte

N'avarraggio maie pace.

Lo marrone pigliato ,

Comm' a no campaniello

Fitto me sonarrà dint' a lo core.

E l' ombre de lo frate, e de lo gnore

Peo de brutte papute, e nnigromante ,

De notte, e ggghiuorno m' avarraggio nnante.

Po le Furie de Casa de Deiavolo ,

Mpena de ss' ommecidio ch' aggio fatto ,

Me farranno abbaglià ll' uocchie nn' atero ,

Sbattennome pe ffaccia

Li cchiù nnire tezzune de lo Nfierno.

Ma. Vì ca lo troppo è troppo :

Non mette ncopp' a ccuotto acqua volluta :

Arrore non è nganno.

Ze. Io te derria

De sfocare ss' arraggia contr' a cchillo

Che te scannaie lo gnore ; e fa che prova

Peccate vecchie , e ppenetenza nova.

Ar. Strascinateme cca sso galantommo ;

Me lo voglio magnà proprio coll' uocchie.

Art. Mo vaco, e ve lo porto.

Ar. Aspetta lloco.

Artabbano, Zemmira,

Mannana, pe ppiatà, non me lassate :

Assistiteme tutte nchisto punto.

A sto momento mmalorato e tristo

Io ntuorno a me vorria

Tutte l'ammice mieie. Prefe', non veco

Arbace : e ttant'ammore che portava

A lo prencepe suio l' ha puosto a mmonte ?

Isso sulo nce manca.

Art. E non sapite

Ca lo rre le facette lo mannato

Da sto palazzo, poccca poveriello

Co ssa gioia de sore che tenite

Volca fare zimeo ?

Ar. Venga, e rresta assoluto.

SCENA UNNECEMA

*Mecampiso, ppo Arbace senza spata,
mmiezo a li sordate, e dditte.*

Meg. Ecco lo reo.

Ar. Comme !

Meg. Arbace mperzona ; e porta scritto

Lo tremenno dellitto

Dint'a cchille brutt' uocchie speretate.

Ar. Oh ammico!

Ma. Oh nnammorato!

Art. Oh figlio!

Ze. Oh frate!

Ar. Arbà! co chessa nutria de pepierno

Me tuorne nnante? `e comme!

Tu che schitto parive n' acqua chiara

Haie avuto lo stommeco ntramente,

D' accidere lo rre?

Arb. Songo unozente.

Ma. (Foss' accossì!)

Ar. Ma tu de ssa nnozenzia

Le rraggiune haie da dì, miettence nchiare

Li sospette, li nnizie; e ddà piacere

A no prencepe affritto.

Arb. No lo fic' io: chesso ve dico schitto.

Art. (Beneditto!)

Ma. L' arraggia che tenive

Contro Serze?

Arb. Era iusta.

Ari. Lo ffuire?

Ar. Chi lo nega?

Ma. Lo starte accossì zitto?

Arb. È ppe forza.

Ar. La cera mortacina?

Arb. Ccossì bole la sciorte.

Ma. E cchella sferra

Cauda de sango?

Arb. Io la teneva mmano.

Ar. E lo mmeccidio non lo tiene a mmente?

Ma. Non lo faciste tu?

Arb. Songo nnozente.

Ar. Ma l'apparenza, Arbace,

Te iura nfaccia, e prove

Tutt' a ddammaggio tuo tutte produce.

Arb. Ma semp' oro non è chello che luoe.

Ar. Tu staie zitta, Zemmira?

Ze. Io so stonata.

Ar. Artabbà, parla tu.

Art. Che v'aggio a ddire?

Non me fido trovà manco peleic.

Ar. Io non connetto cchiù. Manno a la morte,

Comm' a lo cchiù terribbele nemmico,

Lo cchiù ntrinzeco ammico?

Arbà! puozze sta buono,

Tu che tanta affecchienza me mostaste

Sempe co mme cosuto a ffilo duppio:

Chillo pparlà azzecuso,

E cchill' uocchio picciuso erano signe

D' arma nganna-pacchiane?

Potesse a lo mmacaro

Scordarme quanno stiette

Ntra li nemmice p' essere squartato,

E ttu corriste co lo sango tuo,

A ssarvarme lo cuorio, e lo sarvaste!

Ca mo ccà non starria stritto a lo muro,

Puosto mmiez a l'ancunia e lo martiello,

Na patente spedennome de ngrato,

Pe ppoè venneccà Serze scannato.

Arb. Non ghiettastevo no , signore mio ,
Chill'affetto a lo viento ; anze ve dico ,
E crediteme sa , che non ve nganno ,
Ca lo mmereto mo cchiù assaie che tanno ,

Art. E ecco ssa mutria tosta ,
Tu che sà de li reie l'accoppatura ,
Parle d'affetto ? Ah fusse muorto nfoce
Quann' asciste a ghiettà lo primmo strillo !

Arb. Puro tata m'appretta no tantillo !

Art. Che horrisse da me ? chesl'è cchiù bella !

Aggio da dì che nchietta
Accedettemo Serze , io che scasato
Manco sale ne saccio ? Autezza , a buie ;
Si s'è nnellitto ngeneto trovato
Figliemo , vuie facitelo sta a pasto :
Date a sta mala fercola
La sciorta de lo lino ; e non penzate
Ch'io le so patre , e ccientomilia vote
Pe la causa riale
Aggio sparzo lo sango : a chesse strette ,
Rovina (mo nce vo) non ho sparagno ,
Vaca chisto cco ll'autro , e non me lagno ,

Ar. Omno fedele !

Art. Resorvite priesto ,

Nè ssentite piatate

De st'anema dannàta , e mmarpiona.

Ar. E ppozzo nzicco nzacco

Resorvere accossì ? Potta de Bacco !

Comu' aggio da resorvere ?

La vocca n' ha cchiù sciato ,

Lo core sta nchiatrato ,

La capo cchiù no ne' è.

Me trovo a cchisso ntrico

Iodece , figlio , ammico ,

Mmeccedeiario , e rre.

SCENA DUDECESEMA

*Mannana , Zemmira , Arbace , Artabbano ,
e Dditte.*

Arb. E ccomme? senza fà manco no ttecchete ,

Ssi latine a ccavallo aggio a ssoffrire ?

Meg. (Vi che ntressié ?)

(Io cca non veco Proceta.)

Man. (Oh nescia me !)

Art. (Tremmo , e mme raspo ncapo.)

Arb. Gnopà! vuie puro me votate faccia ?

Che agnuno me dia trivole vattute ,

Bene proviso sia : ma po penzanno

Che ll'ogne rosecà puro me faccia ,

E cche boglia mannarme a lo Mercato

Chi m'ha puosto a lo munno ,

N'antecore me vene , e tremmo tunno.

Mo che stanno pe ffarmene mesesca ,

Si lo patre me chianta qua ccetrulo ,

Nè me soccorre a bbuolo ,

A cchi spero? a li Quatto de lo Muolo?

Art. Io te so gnore?
 Tu me sì figlio?
 Chiss'è n' arrore,
 Vattenne, va.
 Si a ffarte viseta
 Vene lo boja,
 La corpa è toja,
 Che nce aggio a ffà?

SCENA DECEMATERZA

*Arbace, Zemmira, Mannana, Mecampiso,
 e li sordate.*

Arb. Barbare Ddeie! Che fuorze
 V' aggio acciso a la connola no figlio,
 E pportate lo lutto,
 Che me state zucanno a non-presutto?
 Cara Zemmira mia, tu che sì sora,
 Compiatisceme, e ssienteme a mmalora!

Ze. Torna da niro ianco,
 Miettete a rritto scianco,
 E ccà stongh'io pe tte.
 Ma nfi che fitto fitto
 Aie nfronte lo dellitto,
 Squaglia, che buoie da me?

SCENA DECIMAQUARTA

*Arbace , Mannana , Mecampiso ,
e li sordate.*

Arb. E non ne'è chi me dà no chiappo ncanna?
Mecampì , si tu....

Me. Fora me ne chiammo.

Arb. Precepè...

Ma. Tu pe mme puoie fà felone.

Arb. Siente , ammi...

Me. Muore ciesso , tradetore.

Arb. Mannà , siente...

Ma. Non so pigna mellese.

Arb. Core mio ; gioia mia....

Ma. Capo de maglio !

Ccossì me vuoie mpacchià , doppo che neuorpo

Aggio pe tte sta pinnolella sciso

De la morte de tata ?

Arb. E cchi l' ha acciso ?

Ma. E ddi , chi fuie ?

Arb. Non pozzo. Chessa vocca....

Ma. Dice pallune cchiù de le gazzette.

Arb. Chisso core...

Ma. Va , cagnalo a ssapone ,

Tene tanto de callo , e cchiù non sente.

Art. (Tata quanto me cuoste !) Si sapisse....

Ma. Saccio , sacco , non fare cannicchie ,

Ca tu l' avive co lo gnore.

Arb.

Ntienne....

Ma. Io ntise pe nfi a n' hacca

Quanno sbafaste contro Serze.

Arb.

È nganno.

Ma. Sì, fuie nganno lo mio, quanno nsertona

Te credea n' agnolillo spececcato,

E a le stroppole toie fede prestaie.

Arb. E mmo....

Mo non te pozzo padeiare.

Arb. E ssi...

Nemmica toia.

Arb.

Donca vorrisse...

Ma. Mpiso a Nnola vederte.*Arb.*

E a ttant'ammore..

Ma. Miettece nomme penna; è tutt'arraggia.*Ar.* E non cride d'affetto a ttante prove?*Ma.* Ch'aggio a credere? sciù! roseca chiuove.

Dimme che sì assassino,

Ch' aie n' anema de pece,

Che sì Pontannecchino,

E a crederte sto cca.

(D'isso vorria scordarme,

Vorria vederlo acciso,

Ma ncagno d'arraggiarme,

Me vene la piatà.)

Dimme che sì assassino,

E a crederte sto cca.

(Quanno le sto becino,

Me vene la piatà.)

SCENA DECIMAQUINTA

Arbace co li Sordate.

Sciorte, mastressa mia, taglia ch'è russo,
 E ppe nfi a rummo e bbusso
 Fa chiovare varrate comme terra.
 Perdo l'ammico mio;
 Sorema me trommenta; chiagne, e strilla,
 Mannana; e ppuro patremo carnale
 Me sta a ffà da scrivano cremmenale:
 Ed aggio a stare co no punto minocca?
 E addò sta n'ato spireto a lo munno
 Cchiù a sticchetto de chisso?
 Giove mio, si tu vaie tanto a ggaloppo
 A refonnerme guaie, penza na vota
 Ch'io so de carne, e cche lo troppo è troppo.
 Vao vocanno co na lanza
 Sfracassata a pròra, e a ppoppa:
 Ccà no viento me sbalanza,
 E mme manna sott'e ncoppa,
 Ccà no truono scassianno
 Me lambeia ntra l'aria scura:
 E sta cana de Fortura
 Puro m'ave a zcffonnà.
 Maro me! so desperato:
 M'hanno tutte abbannonato.
 Che me iova la nnozenzia,
 Si n'è bona a mme sarvà?

Scompetura de lo Primm'Atto.

ATTO SECUNNO

Appartamiente Riale.

SCENA PRIMMA

Artaserze, ed Artabbano.

Ar. Ebbè, attaccammo l' aseno
 Addò vo lo patrone. A bbuie, sordate,
 Mo Arbace ccà portate.
 Sì contiento, Artabbà? Voglia lo Cielo
 Che co sso facce-fronte
 Se potesse sarvare?

Arb. Autezza mia,
 Non borria che credissevo sso mpegno
 Piatà de patre, o na speranza morta
 De trovarlo nnozente.
 Li cccate de Barè puro vedono
 Ch'è rreo, ch'ha da morì: lo flaccio sulo
 Pe bbuie. Chi sape pecchè Arbace ha fatto
 Sso prodetorio? si compagne tene,
 O ha penzato ntra isso
 » Meglio sulo, che mal accompagnato?
 Perzò vorria mo tutto
 Cacciarne lo ccostrutto.

Ar. Io mo te mmidio
 Chisso core de struzzo: e comme? Arbace
 Sta mo mo co lo tafaro a la fossa,

Tu le sì patre, ed io le song' ammico,
 Io stong' affritto, e non hao quatto calle,
 Tu iettà te lo ssaie ret'a le spalle.

Arb. Signò, sta ncornatura

Cara me costa: io puro so de carne,
 E ssento int' a lo core
 Che bo dicere patre; mperò vince
 L' obbreco mio: nè figlio
 Chiammo chi russo russo ha fatto farme
 Comme si fosse asciuto
 Da na festa de ballo.

Primmo d'essere gnore, era vassallo.

Ar. Chessa virtù che ttiene potria fare

Lo paglietta d' Arbace:

Io cchiù te so obbrecoato,

Quanto cchiù tu l' attierre: e rronnarria

Prete pe ttozze, si accedenno Arbace,

Accido a tte. Vedimmo de cacciare

Le munano da sso ntrico:

Attaccate, si puoie,

A no filo de paglia, e famme priesto

E ccontento, e ggabbato.

Arb. Lloco te voglio, Cicco, a sta sagliuta.

Tutto ad isso è contrario; ed isso ntanto

Quanno sente ch' è rreo,

Dice, vota ca s' arde, e fa zimco.

Ar. Ma dice ch' è nnozente: e cchella vocca

Maie non disse papocchie: avrà, marisso,

Raggiune pe sta zitto. Ad isso donca

Parla tu : fuorze fuorze co lo patre
 Meglio potria sfocà , che no co inimico.
 Io squaglio ntanto comm' argiento vivo :
 Parlele chiaro , scavale da cuorpo
 Zò che tene annascuso ; e ppo mpastocchia
 Castielle nn' ario pe defesa soia.
 Accorda comme fosse no liuto.
 Lo cuorio de lo figlio ,
 La pace mia , l' annore de lo trono :
 Fa no quiddo pro quo , ca te perdono.
 Torname Arbace mio ,
 L' ammico de sto core :
 Nnozente lo sacc' io ,
 Nnozente ha da tornà.
 Saie che da peccerille
 Stettermo nzembra , e ssaie
 Che nchietta li squasille ,
 E nchietta aveamo guaie.
 Comme pozz' io st' ammore
 Dall' anema scrastà ?

SCENA SECONNA

Artabbano , e ppo Arbace ntra poche sordate.

Ar. Sto mpuorto pe trasi iappeca iappeca.
 Figlio , azzeccate a mme. Vuie po, sordate,
 Dint' a cchell' antecammere trasite ,
 E a no sisco che faccio e buie venite.

Arb. (Co lo guore me trovo a ccapo a ccapo?)

Ar. Resciato, Arbace mio; pozzo sarvarte.

A cchillo nnoglia d'Artaserze apposta
Nfrocecaie de parlarte.

Pe no grà ccaracò che saccio io sulo,
E che pare la grotta de Pezzulo,
Faccio auzarte li puonte, e tte la sfile.
Ccossì tengo a li bene

Isso, e tutte li sguizzare che tene.

Arb. Lo ffuì farria credere davvero
Ch'io fece lo dellitto.

Ar. Eh bbienctenne,
Mammuocciolo che s'! Comme? te levo
Lo fierro da lo pede,
Te scippo da le granfe d'Artaserze,
Te faccio carrià mparma de mano,
E ssaglirtene ntrono chiano chiano.

Arb. A lo trono? Gnopà, me nfenocchiate.

Ar. Sta famiglia riale da no siecolo
Padciata non è cchiù da nisciuno.
Tiempo perduto non s'acquista maie.
A li sordate che schiattusc stanno
Avasta schitto nn'attemo mostarte.
Colonnelle, maggiore, e cennerale,
Si tu nate, te teneno li panne.

Arb. Io rebelle addevento? Ah che mpenzarlo
Sudo friddo! Gnòpà, vorria restare
Co la nnozenzia mia.

Art. Va te la para!

E cchi la crede cchiù ? Tu staie presone ,
E ppasse pe trellegna , e trapolino.

Arb. N' è lo vero però.

Art. Fattello fritto.

Figlio mio , la nnozenzia è na bellezza
Che sta schitto appoiata
All' uocchie de li chiochiare ,
Che nfaccia se nce ncantano ; e pperdenno
Chesto , soqe restà fummo de paglia.
L' ommo iusto è chi meglio
Aùsa trainielle , e ha sale nchiocca ,
Nè perdenno la coppola a la folla ,
Scanaglianno chi è stupeto e gnorante ,
P' arreto non cadè , se ietta nnante.

Arb. Gnore mio , vuie parlate a nipizzompazzo.

N' arma bella , e nnozente
Se fa schicco a sè stessa , e da se stessa
Se dà tuorto , e rraggione ;
E ssenz' avè paura de li sbirre ,
Co rrecchie de mercante scemianno ,
Li miedecc coffcia , chiaro piscianno.

Ar. Te lo boglio accordà ; ma la nnozenzia
Non è no punto peo de lo campare ?

Arb. E sto campà , gnopatre ,
Che credite che sia ?

Art. No terno secco
Pe cchi a manteca sta faglio de faglio.

Art. È la vita no pasto
Che maguanno maguanno te sfastidia.

Ogn' ora che ne gaude è n' ato passo
 Pe ghì a lo Camposanto ; e ppeccerillo
 S' accommenza a mmorì lillo palillo.

Art. Ed aggio pe sarvarte

A ffà sta potechella ?

Statte zitto, dottore de no fuoglio,
 Scinne la capo p' obbedienza, e bbiene.

Arb. Perdonate, gnopà, si pe sta vota,
 Lassanno la via vecchia pe la nova,
 Non ve dico gnorsine.

Ar. Ebbè, vedimmo

Chi è cchiù tuosto de nuie. Viene pe fiorza:

Arb. Ma lassateme sta! vuie mbè sapite

Ca chi troppo la tira, po la spezza.

Quanno sto ntra lo stantaro e la porta,
 Farraggio....

Art. Ebbiva! appila ch' esce feccia:

Sentinumo che farraie?

Arb. Farraggio lo ppossibele, e mpossibele

Pe non venirve appriesso.

Art. E ccà mo pare

Chi la sponta de nuie. Viene mo proprio.

Arb. All' arme! all' arme!

Statte zitto a ccanchero.

Arb. All' arme! all' arme! priesto,

Mettiteme, sordate, le immanette,

Tornammo n' ata vota ncremmenale.

Art. (lo mo schiatto d' arraggia)

Arb. Tà, le immane ve vaso.

Ar. Che mmane, e ppiede cchiù, figlio marvaso?

Arb. Che naso arricciato!
 Che uocchio! che cera!
 Cchiù doce, e pracato
 Vederve chi spera,
 Sì a cchisse momente
 N'avite piatà?
 Che brutto regore,
 Che pevo consiglio,
 Scordarse l'ammore
 De chi? de no figlio,
 E figlio nfelice,
 Che corpa non ha!

SCENA TERZA

Artabbano, e ppo Mecampiso.

Ar. A st' affetto nzenziglia.

Leva suono Artabbà. Coccinto Arbace
 Vo scavarre la fossa? è peo ped isso.
 Ma a sta bella sbravata
 Responne l'arma mia, te a ta frittata.
 E tant' ammore mio sa da ddo vene?
 Pecchè ment'io so lupo, iss'è n'ainiello.
 Mo l'ammo, e mmo m'arraggio,
 Mo acciso lo vorria, piatà mo n'aggio.

Me. Che facite, signò? nè? a cche penzate?
 Co le ghiorde a le mmano ve ne state?

Le cchiacchiere, se sa, non stann' a niente :
 Mettimmo mano a fferre. A' lo Conziglio
 Li satrape già vanno ; aucielle aucielle
 Tutte nchietta a la rezza li ccoglimmo.
 Levatece da tuorno

Chisse Quarte-dell' Arte, e Spacche-e-Ppesa,
 Non avite cchiù ntuppe a ssagli ntrono.

Ma iammo ntanto a scarcerar' Arbace.

Ar. Ammico mio, la sciorte me tenaglia.

Arbace non bo ntenere spagliocca
 De regno, e llebertà: niente le preme
 Ca s'isso more, non ne fa cchiù mamma:
 E ntanto a rrepentaglio nce ave mise
 No iuorno, o n' auto de vederce accise.

Me. Non tenimmo le mmano pe ccacciarlo,
 E ffarlo stare contro voglia a ssiesto?

Iammo.

Ar. Ma mente nuie co li sordate

Nce ammaccammo la zella a ffecozzate

Pe lleberare Arbace ;

Artaserze è capace

De stare a la veletta, e nnabbissarce.

Me. Aggio tuorto. Io derria, primmo scannammo

Artaserze, e ppo Arbace scarcerammo.

Ar. Ma pe prieggio rommane

De figliemo la vita.

Me. E quann'è cchesso,

Spartimmoce li nuoste, e ddammo neuollo,

A le ccarcere vuie,

Ed io a lo Palazzo.

Ar. Ma recchizze spartute

Deventano meserie.

Me. Nn'ogne muodo.

Mo nce avimmo da auzare da sto nietto.

Ar. È mmeglio piglià tempo

Pe sbroglià sta matassa nnodecata.

Me. E ssi Arbace ntramente

Ha l'ordene de ì a li Camp' Alise?

Ar. Quanno simmo a sti guaie e ceatalaie,

Tanno botta risposta vedarrimmo

Lo fuosso de zompà. Pe mmo m'avasta

Che tu secute a ffà lo sciummo surdo,

E ffedele mantiene li compagne.

Io me metto de casa e de poteca,

Sedognenno le gguardie co manteca,

D'attaccarmele tutte comm' a schiave.

Nfi a mmo non l'aggio fatto,

Pocca pareva pigliare n'ircociervo

Senza besuogno crescere pericole.

Me. Io sto cea pe benirve appricesso sempe

A la Lecca e a la Mecca, a bbarda, e a sella.

Ar. Ma non botarme faccia.

Me. Io voto faccia? La decite tonna.

Tanto ngrato non so : mbè tengo a mmente

Che pe rrazia nasciette int' a na stalla :

Quanto cchiù tengo è veveraggio vuosto :

Da profosso me trovo cennerale,

E ssempe aggio aonnato

Comme lo maro aonna.

Io voto faccia? la decite tonna.

Ar. Zo ch'io fice pe tte nfi a mmo è na cufece.

Si la sciorte non fa n' anca-nicola,

Vedraie che bene appriesso.

Saccio ch'amme Zemmira; ed io pe cchesso

Collera non me piglio; anze vorria....

La vè cca. Mo da patre le commanno

Che te sposasse, e ttanno

Nce attaccammo assaie cchiù co la capezza

De iennero, e de suocro.

Me.

O cche preiezza!

SCENA QUARTA

Zemmira, e Dditte.

Ar. Figlia mia, vè che zito t'aggio asciato?

Ze. (Truono de Marzo!) e cchisso

Ve pare, tata mio, tiempo a proposeto

De penzare a sti nchiaste, mente Arbace....

Ar. Zitto: ponno ste nozzole

Jovarle assaie.

Ze. Ma io nce so contraria.

Dormitece na notte pe penzarce:

Io so...

Ar. Sì pazza sì non dice sì:

Chiss'è lo sposo tuio; vasta accossì.

Vuogliele bene, e quanno
 Sempateco non t'è,
 Dì ntra de te e tte,
 Lo bo lo gnore.
 Po quanno te derranno:
 Nenna, tu zita sì,
 Mpietto oh che tippe ti
 Farà lo core!

SCENA QUINTA

Zemira, e Mecampiso.

Ze. Mecampì, siente buono. Io iurarria
 Che tu muore pe mme; vorria pe sfizio
 Farne na prova mo.

Me. Pe tte farria
 Puro monete fauze.

Ze. Aggio paura
 Ca me dice de no.

Me. Parla, ca passa
 Sta paura che tiene.

Ze. Me vuoi bene?
 E scoglie chesse nozzole.

Me. Io?

Ze. Gnorsine.
 Accossì non m'appicceco co tata.

Me. Te sentarria, ma pare
 Che vuoi iusto co mnico pazzciare.

Ze. Io te dico da vero.

Me. Eh leva suono!

Tu cride d'apprettarme, io me n'addono.

Ze. Tu me coslie appriesso? Io te faceva

No nnammorato cchiù sguazzone.

Me. Ed io

Cchiù acconciata de capo Te credeva.

Ze. Chessa prova sarria

Guapparia da cantà ncopp' a lo Muolo.

Me. Che addimmanna azzeccosa

Da farse a cchi t'è zito!

Ze. Era mo tiempo

Che facennote annore aternamente,

Poteva resciatà st'arma dolente,

Me. Non fa pe mme st'annore ntossecuso.

Ze. Donca parlo a lo viento?

Me. Sissignora.

Ze. E li selluzze a ppietto de cavallo?

Me. Non servono no callo.

Ze. E le suppreche meie?

Me. So ncienzo a mmuorte.

Ze. Ebbè, farraggio comme vo lo gnore:

Ma sliente mo ssa predecozza a braccio.

Non te fare passà manco pe ssuonno

Ch'io penzo a tte. Iastemmarraggio sempe

L'ora che me sposaste; e dda chell'ora

Malanne puozz'avè mascole, e flemmene

Quanno squase me faie, te sputo nfaccia.

E ssi pe forza chessa mano avraie.

Sto core non sperà maie e ppo maie.

Me. Non corre tanto lo cavallo mio.

M'avasta nguadiarte: e ssi p' arraggia

Tu aspiette quarche chiappo che me mpenna,

Io dico, senza farte lo prociesso,

Cuofano saglia, e ppo cuofano scenna.

Io non tengo lo prorito

Dirte cana, e tradetora:

Vasta d' esserte marito,

. Chesso voglio, e nniente cchiù.

Lasso schitto a li sciaddeie

Smerzà n' arma dint' e fflore,

Pe spià si tene ammore,

Si difiette, si vertù.

SCENA SESTA

Zemmira, e Mannana.

Ze. Quante guaie co la pala int' a no iuorno

Chioveno neuollo a mme! Vuie, prencepessa...

Ma. Statte bona, Zemmira.

Ze. E addò corrite?

Ma. A lo Consiglio.

Ze. Io vengo p' aintare

La paranza d' Arbace a trasì mpuorto.

Ma. Ma niro io veco ccà, tu vide ianco;

Mpiso io lo voglio, e ttu libbero e franco.

Ze. E accossì po parlà la nnammorata

D' Arbace ?

Ma. Accossi parla

N' orfanella de patre, e patre acciso.

Ze. Fratemo o niente fice,

O lo ffice pe buie pe troppo ammarve.

Me. Chesso le rompe tutte doie le ggamme.

Volennolo squartato, io faccio mettere

No punto mmocca a ttuttè ;

E benneco lo scuorno de sto core

Ch'è de sango riale, e ammanno ad isso

Dovea farlo n'arroio addeventare ,

Non già nfame nn' atero

Cchiù de tutte le Ffurie de lo Nfierno.

Ze. E fuorze la valanza de la legge

Non sceune iusto pe chiammarlo reo ,

Che aggiognerece volite n' ato ruotolo

De caretà pelosa ?

Ma. E ffaccio buono. Io credo ch' Artaserze

È senz' Arbace suio pesce for' acqua :

Credo tutte li satrape pedl isso

Aunite pe le fà vruoccolè, e gnuoccole :

E all' urtemo po credo che lo sarva

Chella magnetta soia sciuvè sciuvè ,

Chillo parlà pateteco pateteco ,

Che ncantare te sole ,

E tte fa di, è ppenzà comm' isso vole.

Ze. Ebbè, iate a rredurlo nchiana terra,

Secotate lo mutto

« Ad arvolo caduto accetta accetta »

Mesurate mperò le fforze voste.
 Avite da scordarve chelle zeze,
 Chill' uocchie a zennarielle,
 Chille trascurze nzifra,
 Chille sbaratte, chill' ascì de quarte,
 Che figlie non d' arraggia, ma d' ammore,
 Ve facevano fà tanto de core.

Ma. Pepitola a ssa lengua! Io che te ficc,
 Che stuzzecà me vuoie, brutta Zemmira,
 Chella piatà che peo de no Tentillo
 Aggio a caccià da me, piatà che a bbotte
 De vertù vott' arreto? E te ne viene
 Co sso bello trascurzo che me nciarna,
 A rennovà no serra serra a st' arma?

Si da sto brutt' ammore
 Fora crediette ascì,
 Lassame stà nn' arrore,
 Lassame armanco di,
 Cchiù no nce ncappo.

Io sdigno aggio a mostà
 P' obbreco mio, lo ssaie,
 E ttu vedè zò faie
 Causa de chiappo?

SCENA SETTEMA

Zemmira.

Grillo, annevina tu ntra tante guaie
 A qua mprimmo aggio a mmettere remmedio.

La prencepessa , fratemo , lo gnore ,
 Lo nnammorato vero , e l' apposticcio ,
 Tutte me so nnemmicce : agnuno mette
 Prete de ponta int' a sto core ; e mmente
 Una n' arrasso , l' auta se nec mpizza ,
 E l' ammaccano peo si fosse pizza.

Quanno sbocca na sciummara ,
 Doppo n' acqua a ccielo apierto ,
 Llà sepponta , ccà repara ,
 Lo massaro attuorno sperto ,
 E non sape cchiù che fa.

Si da ccà la via s' appila ,
 Nciente pizze llà se spila ;
 Si a la rritta l' onna ntoppa ,
 A la manca va pe ccoppa ,
 E ffa tutto zeffonnà.

SCENA OTTAVA

Salone de lo Conziglio co lo trono da no lato , e co
le ssegge nnaorate dall' auto pe li segnure de corte,
Scrivania , e seggiolone a la mano ritte de lo trono.

Artaserze portano nnante na ventina de sordate , e attuorno li ciammerlane de Palazzo. N' ata battuglia de sordate le guarda le spalle ; e all' utemo Mecampiso.

Duche , marchise , princepe , e barune !
Pe lo fidecommisso de sto regno
Me metto ncapo la corona d' oro.
Ma si da la matina si canosce
Lo buono iurno , co no brutt' aurio
Accommenzo a regnà. Ma vuie che site
Li qualisse de Perzia
Pe nnumero , pe ppiso , e ppe mmesura ,
Mo la mano me date ,
E a ssaglirmene ntrono m' aiutate.
Me. Maistà , cca fora stanno
E Mmannana e Zemmira pe pparlarve.
Ar. Falle trasi. Mo siente lo pro e contra ;
Ed agnuna de llo
Vene a ffa comme fosse no paglietta.

SCENA NONA

Zemmira , Mannana , e dditte.

Ze. Artaserze , piatà.

Ma. Signò , vennetta.

Voglio muorto lo reo.

Ze. Libero voglio

Lo nnozente.

Ma. Succiesso è l'ommecidio.

Ze. E sse sa chi l' ha fatto ?

Ma. L' apparenza

Tutta è p' Arbace.

Ze. E ttutta la raggione

È ped isso porzì.

Ma. Lo sango nuosto

Cacciato da le bene de no patre

Vole pena.

Ze. Porzi lo sango vuosto

Sarvato int' a le bene de no figlio

Aspetta premmio.

Ma. No scordarte mai...

Ze. Allecordate sempre...

Ma. Che ssepponta de trono è lo regore.

Ze. Che ffunnamiento n' è doce cremenza.

Ma. Non te sceta l' arraggia n' orfanella

Sperta e demerta ?

Ze. Non te scappa a cchiagnere

A bista de na sora sconsolata ?

*

Ma. Tutto fora che cchessa , a liengue ncanna
Tutto lo munno ssa iostizia aspetta.

Ze. Artaserze , piatà.

Ma. Signò , vennetta.

Artas. Auzateve da terra, Io tengo ncuorpo
' Cacciottielle cchiù peo de chisse vuoste.

Ha paura Zemmira

De lo regore mio : Mannana tremma

Pe la cremenza. E ntanto ammico , e figlio ,

Comm' a no miercodì mmiezo restanno

Ntra Mannana e Zemmira io sto tremmanno,

A ttiempo a ttiempo arrive ,

Prefetto mio , pe cconsolarne. Dice

Niente de buono ? S' è spiegato Arbace ?

SCENA DECIMA

Artabbano , e dditte.

Co sto cuozzo d'Arbae se nce perde ,

Maistà , l' acqua , e ssapone :

Nuie decimm' arre , e cchillo llà se corca.

O è pazzo , o desperato.

Artas. E bbole a fforza

Ch'io lo connanno? Ah sgrato!

Ze. Lo connanne ?

Crudde ! Faie vasare da lo boia

De Zemmira lo frate ,

De la Perzia l' annore ,

De no rre frisco fatto
 L'ammico, e defensore?
 Scasato Arbace! chianto mio perduto!
 Pene sparze a lo viento!

Artas. Tu me chiamme
 Senza sapè pecchè ccossì crudele.
 Ch'aggio a ffà, s'isso manco se defenn?
 Tu che farrisse? che farrìa cca patreto?
 Chi vincere non pò, cerca mpattare.
 Sordate! Arbace ccà: isso lo senta,
 Lo libera, si pò: pe cchiiss' affare
 Comme fosse lo rre.

Arb. Comme!
Ar. Che dice?

Ma. L'obbreco tuio co l'aumecizia perde.
 Bella pena le daie,
 Quanno l'ave no patre a iodecare!

Artas. Lo iodeca no patre ch'è fedele,
 Che accusa chillo figlio, ch'io vorria
 Defennere de core: e a ccastecarlo
 Cchiù raggiune ha de ine.

Ma. Ma semp'è patre.

Artas. Tanto cchiù co sso rco ncasa la mano.
 Io pozzo vennecà schitto de Serze
 La morte, ed isso po, previta toia,
 Lo rre scannato, e la vriogna soia.

Ma. Donca ccossì...

Artas. Ccossì, si Arbace è rco,
 Serze, avemo la vittema, sta pace,

Ed io me trovo nregola co Arbace.

Ar. Ma sto ncopp' a no taglio de cortiello.

Artas. E cchiù annore n'avraie.

Ar. De sta pensata

Che derranno, signò?

Artas. Ch' ànno da dicere?

Parlate. Ve capaceta sto suono?

Me. Stanno zitto, maistà: donca va buono.

Ze. Vecco fratemo.

Ma. (Aimmè!)

Artas. Se senta.

Ar. (Ammore

De patre, è tiempo de ngottare, e zitto.)

Ma. (Eh no sbattere cchiù, core trafitto!)

SCENA UNNECEMA

Arbace ncatenato ntra poche sordate, e dditte.

Donca tanto songh'io nn'odio a la Perzia,
Che mmo che sto pe ghi nfunno de mare,
Lo Cielo sa pecchè, tutta cca vene?

Maistà...

Artas. Chiammame ammico: io, nfi che beco

Ntra lummo e ffusco si sì buono o tristo,

Tale te songo: e ppocca chisso nomme

Pe no iodece, è corpa, a lo Prefetto

Aggio dato *auto-reco*.

Arb.

A tata?

Ar. Ad isso.

Arb. (Na simpeca m' afferra)

Ar. Maraveglia

Forze te faie commo sto ancora mpiede ?

Arb. Me s' affiuscano ll' uocchie , gnore mio ,
 Llà guardannove schitto. E sto ppensanno
 Vuie chi site , io chi songo , e ccomme maie
 Co la penna a la chiocca , e ccarta nnante
 Iodecarme potite ? E cchella faccia
 Non fa mille colure ? E non sentite
 Ncuorpo tutto lo Nfierno scatenato ?

Ar. Te ncareche de chesso ? La cocchiara
 Sape sulo li guaie de la pignata.
 Nn'ogne muodo però la corpa è toia
 De farne cadè ncuollo ssa colata.
 Si tu non ive tanto capotuosto ,
 Si a patreto ntennive , a lo rre nnante
 Ntorniato da tutte li qualisse ,
 Iodice io non sarria , reo non sarrisce.

Ar. Povero patre !

Ma. Ebbè ! simmo venute

A sentire ssi trivole vattute ?

Aggia lo reo la vita , o cinco lettere.

Arb. (Oh che regore !).

Ar. A l' addemmanne mie

Donca respunne , Arbace. Tu sì reo

Comminto , e non confesso.

N'ammore a spaccastrommola , n'arraggia

Contro Serze...

Arb. E ppalosso , e ssango , ed ora,
 E lluoco , e tremmoliccio , e scappà fora
 Non me fanno parè buono pe niente;
 Ma lo vero chest'è : songo nnozente.

Ar. E ffaccello a bedere : a lo mmacaro
 Cchiù Mannana n' avrà tanto de musso.

Arb. Si non bolite , o gnore ,
 Farne sbertecellà , non me toccate
 Addò tengo la chiaia. A cchillo nomme ,
 Patre no , ma patrigno...

Ar. E statte zitto !
 Pazzaglione che sì : non tiene mente
 Addò staie , co chi parle , e cchi te sente ?

Arb. Ma , tata caro...

Ar. (Ammore
 De patre , è tiempo de ngottare , e zitto.)
Ma. (Eh non sbattere cchiù , core trafitto !)

Ar. Lo scarrupo ch' aie fatto. a fforza vole
 O. defesa , o cercà meserecordia.

Ar. Agge piatà de nuie !

Arb. Maistà , non trovo
 Nè ccorpa , nè ddefesa ,
 Nè , cot peo , na raggioné a mme pentire.
 Si sempe me farrite
 Pe no siecolo , e mmiezo ss' addimmanna ,
 Sempe accossì derraggio ,
 E no fuorfece fuorfece farraggio.

Arb. (Oh figlio caro mio !)

Ma. O parla , o se sta zitto ,

Le scorre la mmozzenzia pe tallune.

Che se penza? Sso iodece volgare
Sta co le mmano mmano? Isso è lo patre
Che mmenarlo dovea doie vote a mmorte?

Arb. Me vuoi mpiso, Mannana?

Ma. (Arma, sta forte.)

Ar. Precepè! chisso sdigno fa saglirime
A li ciele celoro. Parlarranno
Sule la Perzia, e lo neverzo munno,
De federtà e ghiostizia a cchist'asempio
Nterra non bisto, e non sentuto ancora.
M'è figlio Arbace? e ssibbè figlio, mora.

Ma. (Mara me!)

Artas. Sso decreto ad anapierde
Scassa, ammico.

Ar. Mo è scritto; ed è fenuto
L' obbreco mio.

Artas. Che grolia mmalorata!

Ze. Patre crudele!

Ma. (Eh sì, me scappa a cchiagnere.)

Arb. Chiagne; Mannana mia? piatà sentiste
De sto frommiento mio barbaro tanto?

Ma. Spisso no gusto fa schioppà lo chianto.

Ar. Iodece cremmenale

Io non songo cchiù mo: pozzo a l'ammore
De no scasato gnore
Dare sfuoco, Maistà? Figlio, perdona
A la barbara legge
De n' obbreco teranno. Agge pacienza,

Ca sta pena fenesce : e lo Mercato
 Non te faccia nchiatrà. Cchiù peo malanno
 Non nc' è de la paura.

Ar. O tata mio ,
 Me s'appannano ll'uocchie. Io songo reo
 Nfaccia a lo munno : le speranze meie
 Qua ccannela de sivo so scolate :
 Posta appena la varva ,
 Sento sonarme le ccampane a mmuorto :
 M' hanno nn'odio , si fosse qua deiavolo ,
 E ll'ammico , e la Perzia , e chella gioia ,
 Chella gioia de st'arma. E sto vedenno
 Che ppo lo gnore mio.....
 Cano de gnore... (aggio a crepà) bonnio.

Ar. (So ielato)

Ma. (Sconocchio)

Arb. Ah facce-tuosto ,
 So asciuto fore via
 Qua ccavallo sfrenato : O tata caro ,
 Co le ddenocchia nterra
 Io te cerco perduono ! lo dolore
 Me mannava da pazzo a lo Ncurabbele.
 Tutto lo sango mio scorra a cconnutto
 Cchiù de lo Vullo de la Nunziata ,
 Ch'io ve do la quietanza ; emmo pe mmone
 Chella mano , gnopà , voglio vasare ,
 Che a l'Alise me manna a ppassiare.

Ar. No cchiù : susete , figlio : aie bè rraggione
 De lagnarte che patreto te mpenne ;

Ma... Pigliate st'abbraccio, e bavattenne.

Arb. Pe cchiss'abbraccio, o gnore,

Pe sso bonnì de core,

Penzate alliegro stare,

Mannana mia pricare,

Defennere lo rre.

A mmorte io vao contiento,

Si vole ogne trommiento

Schitto sfocà co mme.

SCENA DUDECESEMA.

*Mannana, Artaserse, Zemmira,
e Artabbano.*

Ma. (Ah ça partenno Arbace, io sto provanno
Ch'autro è pparlà de morte, autr'è mmorire.)

Ar. Precepè, mo n'avite che me dire:

Praca lo sango mio l'arraggia vosta.

Ma. Mannà li vische tuoie! da cca mo squaglia;

E da mone a nnennante cchiù non puozze

Trovà luoco nè fuoco.

Va te nforma ntra l'aneme dannate,

Si puro chelle vonno dà recietto

Mmiezio a zoccole, ruospe, e scorpione

A no patre ch'è ppeo de coccotrillo,

Che da lo Nilo auzanno li carcagne,

Primmo scanna la ggente, e ppo la chiagne.

Ar. Donca la virtù mia...

Zumpe da palo mperteca.

Saie ch'ogne stremo è bizio?

E quanno la virtù non ha compasso,

Miezo munno te manna a precepizio.

Ar. Ma non fusteve vuie che fitta fitta

Me stisteve nconsiglio a stuzzecare

Comme fanno a no ciuccio co lo spruoccolo?

Ma. Io fuie, gnorsine, e bboglio

Tirarmene pe llaude le ccazette.

E ssi Arbace dovesse iodecarse

N'ata vota, io farria da frisco a frisco

Chella stessa canzona. Io bè ddoveva

Vennecare no patre: e ttu sarvare

Bè ddovive no figlio. A tte l'ammore,

A mme l'odio spettava. Io da sto core

Dovea scassare Arbace; e ttu dovive

Dint' all'anema a llettere de scatola

Scrivere ch'ive patre. E cchi de nuie

A ffà l'obbreco suio cchiù attiento fuie?

Va, snaturato patre,

Ntra l'urze, e le ppantere;

Va, ca de chelle ffere

Tu llà sarraie lo rre.

Si lo neverzo munno

Vuote da capo a ffunno,

Non trovarraie, lo gghiuro,

Mostro cchiù peo de te.

SCENA DECEMATERZA.

Artaserze, Zemmira, e Artabbano.

Artas. Vî lo Cielo, Zemmî, comme se spassa
Co Arbace?

Ze. Zuca cca, nennillo mio:
Vorria crederte sa, ma non me fido.
Vî che zoccola vecchia, e mmassiatà?
Tu l'accide, e lo chiagne?

Artas. E cchess' appriesso?

Voliette, pe fa meglio
Ncuollo a lo gnore suio iettà sto piso:
E ssò zoccola vecchia, e ll'aggio acciso?

Ze. Chessa fuie na terata de mammoria
Pe portà l'acqua a lo molino tuio.
Lo gnore, essenno iodece, doveva
Stare nnante a la legge.
Co lo cappiello mmano; e ttu potive,
Passà ncopp' a la legge a piede chiuppe,
Essenno rre. Lo gnore non poteva
Esse piatuso, e lo rre sì. Lo fatto
È ca vuoie comm' a scigna la castagna
Cacciare co le granfe de la gatta
Da lo ffluoco; e non tiene int' a lo core
Nè ammecizia, nè ammore.

Artas. Ebbè, dica la Perzia, io me sto zitto,
Si so grato ad Arbace,
S'aggio piatà de te, si t' ammo ancora.

Ze. Fatte sempe mo cunto, ammico Cesare,
 Ca cchiù non me la faie.
 Te crediette nfi a mmo piatuso ammante,
 Ed ammico sguazzone; e mmo che t'aggio
 Scovierito a rramma, nveretà te dico
 Che si de quatto a mmazzo ammante, e ammico.

Na tигра puro
 Si sente ammore,
 Non ha cchiù duro
 Tanto lo core;
 E lo lione
 N'aino se fa.

Mpietto tu tiene
 N'arma de boia;
 E de le lacreme,
 E de le ppene
 De nenna toia
 Non aie piatà.

SCENA DECIMAQUARTA

*Artaserze, ed Artabbano.**Artas.* Aie visto nè Zemmira

Che tterata de recchie m'ave fatta?

Ar. Avite ntiso neh la prencepessa

Che canzona de Zeza m'ha cantata?

Artas. Io so pasta de mele, e cchella dice

Ch'io so no vommetivo?

Ar. Io songo lo campione de l'Arifece,

E mme chamma valanza ncontrabbanno?

Artas. E la cremenza mia sta raccoglienzo

Sorva pe pera.

Ar. E la iostizia mia

Ave ncagno de pane spute mmocca.

Artas. Int'a nò iuorno songo rociolato

Da le stelle a le stalle.

Ar. Eh, vuie chiagnite?

E llassate a mme sulo

Chessa doglia de ventre che m'accide.

Artas. Ma si l'Afreca chiagne, Asia non ride.

Io non saccio, e non me ntrico

Si lo patre, o si l'ammico

Sia cchiù digno de piatà.

Ma iurà potria sto core

Ch'eva sfizio a mme l'ammore,

Ev'a tte necessetà.

SCENA DECIMAQUINTA

Artabbano.

È lo vero , sì o no , ca stongo sulo ,
E ppozzo resciatà comme me pare?
Nsentennome d' Arbace dechiarare
Iodece , me schiantaie peo de focetola ,
Quanno sente ntronà na scoppettata ,
È a mme da reto non capca na setola.
Ma passato mperò sto malo passo ,
Mo che sarvo songh' io ,
Aggio puro a ssarvà lo figlio mio.
 Quanno no truono sferra ,
 E miezo munno stona ,
 Friddo de facce nterra
 Lo pecoraro va.
Ma quanno po s' addona
 Ca sano e ssarvo stace ,
 S' auza , resciaa ,
 E bbace
 Le pecore a ccontà.

Scompetura de lo Secunn' Atto.

ATTO TERZO

Cremmenale dint' a lo castiello , addò sta carcerato
 Arbace. Cancelli de faccia. Portella a mmano rit-
 ta , pe ddò se saglie ncopp' a lo Palazzo Riale.

SCENA PRIMA

Arbace , e ppo Artaserze .

Arb. No scasato vo la mörte?
 Chella cionca , e non ho ì :
 N' ato po che tene sciorte
 Tuppe tappe ha da morì.

Ar. Arbà !

Arb. Signore mio , dint' a sta grotta
 Che tene nate e ppaciate ncuorpo
 Le mmeigliare de vierme vuie venite ?

Ar. Vengo pe la piatà , pe l' ammecizia.

Arb. Ma ccà nc' è lo mal' ario.

Ar. Io pe ssarvarte
 So trasuto.

Arb. Sarvarme ? .

Ar. Statte zitto.

Pe chillo scalandrone a mmano ritta
Che da Palazzo sponta a le ppadule
Fuie mo a scapizzacuollo.

Co sto sarvo connutto addò tu arrive
Penza all'ammico tuio, penza a stà buono.

Arb. Ma si reo me credite,

Vuie sarvarme volite? e si ve pare
Ch'io sia nnozente, aggio a ffuì?

Ar.

Ma siente.

Si tu sì reo, te torno chella vita
Che tu me diste; si po sì nnozente,
Aie da fà Marco sfilà, azzò non aie
Da palla vecchia no pertuso nuovo.
Non perde tiempo mo; ccossì sparagne
De n'ammico all'ammore sbiscerato
De vederte ccà mpiso, o fucelato.

Praca de st' arma mia lo serra serra.

Non saccio sì me ceca l'ammecizia,

O lo Cielo se fa de la nnozenzia

Avvocato-de-Povere; ma saccio

Ca non trovo arrecietto,

Si tu sarvo non sì. Na voce sorda

Comm' a vespa me nfroceca a le rrecchie,

Quanno penzo a lo mereto, e a la corpa,

Ca chessa è notte scura de Frevaro,

Chillo de Giugno e Lluglio è sole chiaro.

Arb. Lassateme morì. Nfaccia a lo mummo

Passo già pe birbante; e buie dovite

P'obbreco castecarme. Alliegro moro,

Pocca dongo a sso rre de tutto core ,
Na vota lo campà , n' auta l' annore.

Art. Quanno maie ste pparole nzuccarate
So asciute da la vocca

De reie matricolate ? Arbà , spicciammo.

Pe sarvarme l' annore , nsicco nsicco

Derraggio che na bobba te mannaie

A chill' aute cazune : e zzò lo fice

Pe no me ntossecà chësta iornata

Che me veco Maistà co la corona.

Art. Ma co lo tiempo si s' appura tutto...

Ari. Sì no lenneno fitto : eh vavattenne !

Comm' ammico , te preco ; e ssi precanno ,

Tu scemije , comm' a rre te lo commanno.

Art. A lo rre *supra capite* : obbedisco.

Pozza rennerte Arbace quarche iuorno

Pe ppera secche pera sceroppate !

Senta lo Cielo mo sta razeione :

Artaserze che regna ! ed aggia sempe

Contentizze a ccantara , e ppene ad ognà.

Pozza afferrà pe tuppo anno ped anno

La vettoria , e la sciorte : ♣e li nemmice

Redutte nchiana terra , pe campare

Facciano sempe cera co lo cuoppo ,

E ppezze co la sporta. Senza pressa

Le Pparche se spassassero a ffelare

Li iuorne suoie co la conocchia d' oro.

E ppe sicche de singolo l' avuro

Chella pace ch' io perdo ,

E cche non spero ascià nfi a cchillo iuorno
Che non so qua bettura de retuorno.

No passaro canario
Fore de la gaiola,
Fa quattro trille , vola
Mo vascio , e mmo pe ll' ario ;
E ttanto gira , e bota ,
Che torna n' ata vota
Ngaiola a sse mpizzà ;
Pocca llà sempe trova
Cannevo , e fronna nova ;
Nè tremma che lo niglio
Lo venga ad aggranfà.

SCENA SECONNA

Artaserze.

Chill' uocchie a zennarielle, e cchella cera
Che fa lo pizzo a rrisa
No , nsignale non sò d' anema cana.
Chello de fore non commoglia maie
Zò che dinto se cova : e ssi se squatra
N' ommo da capo a ppiede,
Si è buono o tristo , nn' attemo se vede.

Nuvolella si se mpizza
 Ntra la terra, e ntra lo sole,
 Appannà lo pò na sghizza,
 Ma scurare no lo po.
 Sciummetiello che qua vrito
 Nette e celiare l'onne tene,
 Po annasconnere l'arene
 Ch'ave a ffunno? signornò.

SCENA TERZA

Artabbano co na maniata de congiurate appriesso, e ppo Mecampiso. Na decina de congiurate resta nsentenella nfaccia a la porta.

Ar. Figlio, Arbace, addò staie? Sarrà nsorduto,
 Che non sente ste buce. Arbà? Mmalora!
 Addò s'è ncaforchiato?
 Compagne mieie, nfi che non trovo Arbace,
 State a la porta nsentenelle morte.

Me. E restarm' accossi? tiempo sarria....
 Ma non beco nè Arbace, nè Artabbano.
 Che se fa, che se penza? Avriamo a ccorrere
 Qua ddaine, e ggghiammo peo de lc ccestunie...
 Prefetto mio, signò?

Ar. So arroienato!
 Non trovo Arbace: e ascevolì me sento.
 Tremmo... Chi sa... nascuosto.....

Voglio spiare reto a cchillo puzzo.

Oh, Mecampì!

Me. Signò!

Ar. Trovaste Arbace?

Me. No sta co buie?

Ah. So guaie quanno s'arriva

A sti dicote e disseme.

Me. Parlate

Chiario; che nn'è d' Arbace?

Ar. Non ne saccio nè nova, nè novella:

No sto mmare, nè nterra,

Anze me trovo ntra Carella e Scigna.

Chi sa si campa figliemo, o doie botte

Non le fanno magnare cchiù pagnotte?

Me. Non corrite, signò, pe Becenzone,

Nè ffacite a la sciorte na quarera.

Verborazia, Artaserze che l'è ammico,

E Mannana che bede

Pe ll'uocchie suoie, l'avranno co na mbroglia

Fatto fù. Vedite, o no la via

Che sponta all' antecammere riale?

Ar. Chille a ggatta cecata

Non ghiocono co mme; l'avriano ditto.

Mecampì, sarrà cuotto lo zoffritto:

Arbace è muorto, e agnuno

Co starse zitto, dicere me vole:

A buono ntennetor poche parole.

Me. Vada nfunno de mare ssa papocchia!

Non v'abbampate comm'a n'arteficio:

Resciatate, pigliateve

Na pezzecata de Leccese; e doppo

Vedimmo de portà mpuorto sta mpresa.

Ar. Qua mpresa? de la Bonafficiata?

Perdenno Arbace, s'è perduto tutto.

Me. Prefè, scusate si m'avanzo a ttanto:

Donca s'è pazziato

A mmammara e nocella, rebbellanno

Io li sordate, e buie li carceriere?

Non se perda cchiù tiempo; o dinto, o fora.

Nfra n' at' ora Artaserze

Farrà qua rre lo iuramiento soletto.

Io dint' a lo bicchiere apparecchiato

Pe chessa funzione aggio mpizzato,

Comme vuie me decistev, l' arzeneco.

E doppo tanta stiente

Nce restammo nzenziglia a monnà nespole?

Ar. Si Arbace non nc'è cchiù, pe cchi lo faccio,

Pe ste brache salate? Isso eva schitto

L'anema de sto core;

Io fuie, pe farlo rre, no tradetore;

Pe tante mbroglie, e prodetorie fatte

Non me pozzo vedè quanto so luongo.

Perdenno ad isso, io resto

Co na mosca ntra mano; e beco strutto

De tante mpeche nn' attemo lo frutto.

Me. Arbace o sta nfigura, o nsepotura,

Sempe, e ppo sempe aspetta

Lo regno, o la vennetta.

Ar. E cchessa schitto

Ancora mpiede me fa stà. Me ietto

Mbraccia a tte, Mecampiso, ammico mio.

Me. Fidateve, signò, de chisto fusto,

E ve dich' io che ve darraggio gusto.

A rrotta menare ,

Nzorfare

V' avite ;

E Arbace sarvate ,

E ghiate

A rregnà.

Si nfuria sta n' arma

Che aspetta

Vennetta ,

Che perde la carma ,

Che n' ave da fà ?

SCENA QUARTA

Artabbano.

Me portate lo musso , aterne Ddeie ,

E avite iusto nnevenato a ppilo

Lo pizzo , addò sto core è tellecuso.

Penzanno sulo che non campa Arbace ,

A le ppene cchiù amare

Tutte le pporte de cchest' arma rapo ,

E no me sento cchiù la capo ncapo.

Figlio, si a Llete staie,
 Llà scennarrà lo gnore,
 Ma nnante mmasciatore
 Ha da sfilà no rre.
 E di da mo a Caronte
 Che non movesse rimmo,
 S'io non arrivo primmo
 A me mmarcà co tte.

SCENA QUINTA

Cammarino dint' a l'appartamento de Mannana.

Mannana, e ppo Zemmira.

O sarrà che li guaie venenno nfrotta,
 Tante che l'uno non aspetta l'autro,
 Nce fanno fà lo callo, o sarrà fuorze
 Che qua bota ngarranmo
 Cierte cose che manco nce penzammo.
 A mme pare che Arbace
 Se portarrà la poglia a sso tressette.
 Sarrà vivo: scommetto 'ca si fosse
 Muorto, già lo sapria. Porta lo viento
 Le mmale nove.

Ze. Eh sì, potite rirere

Mo, prencepè, ca veliate mpoppa.

Ma. Fratemo fuorze ha lebberato Arbace?

Ze. O l'ha mannato a l'ato munno mpacce?

Ma. Comme !

Ze. Nsecreto miezo a lo Mercato

Se n'è saputa già la bella sciorte.

Ma. Oh nnevinc a la smerza! oh iuorno! oh morte!

Ze. Vì che sfizio, e bennetta avite avute?

Pe sta notizia certa

Me mmereto la nferta. Avasta, o puro

Sango frisco volite, e mmuorte nuove?

Parlate.

Ma. Ammica mia,

Chillo che soffre poco, parla assaie,

E lo selenzio de gran pena è signo.

Ze. Io n'aggio vist' ancora

N'arma cchiù cana de la vosta. Agnuno

Che sente ssa disgrazia

Sta a ffà no chiagnesterio,

E zimeo vuie facite a sto streverio?

Ma. Quanto cchiù strille, meno doglie siente,

Ze. Si contenta non site, mo zumpate

A bedere d' Arbace

Lo cuorpo muorto mmiezo a la mmonnezza;

Contatene le cchiaie, e ll'ossa rotte,

E mmettite a ccantarve na canzona.

Ma. Squaglia, e cchiù non parlare.

Ze. Io cca sto bona.

Nfi che sciato terraggio,

Appriesso a buie sarraggio

Na zecca cavallina pe ve fare

Desperata e nfelice.

Ma. Comm' asciute me so tante nemmice?

75

Na cana me cride ,
Che vuoie cchiù dolore
Refonnerme ncore ?
E ccomme , non vide
Che barbara sciorte
La morte me da ?
L'arraggia che tiene
È fora stascione ,
E ffa ntra sse bene
Lo sango ielà.

SCENA SESTA

Zemmira.

Io so proprio na scema
Co lo parolo e mmassa : me credeva
Che facemo sso piso tant' a pparte
Co Mannana , se fosse alleggeruto ,
Ma cchiù peo me carfetta , ed è cresciuto.
Ca l'aggio ditto mo tante mproperie ,
Che n'aggio recavato ?
Danno ad essa na botta int'a lo core ,
Non pe cchesso lo mio non è nchiaiato.
E che sciorta de penzata ,
Stanno tanto negrecata ,
Fare l' aute negrecà ?

Se fa peo, pecchè vedenno
 Quarche prossemò chiagnenno,
 Cchiù te vene a pecceià.

SCENA SETTEMA

Arbace, e ppo Mannana.

E mmanco l'aggio asciata. Io mo vorria
 De Mannana praca l'arraggia storta;
 Dirle schitto bonnio;
 E ppo benaggia l'ora che m'abbio.
 Mo me mpizzo cchiù dinto... Ah faccetuosto!
 Che faccio? Zitto zì: la vè; mo vene.
 Me se iela lo sango int'a le bene.
Ma. Muzze d'ufficio, state a la veletta,
 Nè facite trasi manco na mosca.
 Ammore desperato,
 Mo potimmo sfocà da sulo a ssulo.
 Si li juorne accortaie d'Arbace mio,
 Iostizia vole d'accortà li micie.
 Eccome cca....

Arb. Non sia pe dditto.

Ma. Oh Ddeie!

Arb. Tu sì ghiuta mpazzia?

Ma. Da ddò sì asciuto?

Tu staie libbero, e ccampe?

Arb. N'ammico appe de me compassione.

Ma. Fuie mo proprio, vattenne!

De me scasata che derranno Ncorte ,
 Si te trovano cca ? Sgrato , sgratone ,
 Lassame mpace.

Arb. E cchi tenca lo stommeco ,
 Senza vederte fa filone ?

Ma. Oh bella !
 E da me che pretienne , tradetore ?

Arb. Precepè , lèva mano a ssa canzona.
 Haie no core azzecceuso
 Comm'a no franfellicco , e ffaie vedere
 Ch'è mpastato de fele ?
 Tu teniste la vocea pe parlare ,
 E le rrecchie tinn'io p'ausoliare.

Ma. O tu dice papocchie ,
 O non sentiste buono ,
 O io parlaie comute se parla nsuonno.

Arb. Co tutto zò song'io ,
 Mannà , lo bello tuio.

Ma. Sì l'odio mio.

Arb. E quanno è chesso , levate lo sfizio :
 Ccà sta la sferra , ccà lo pietto : mena.

Ma. Sarria la morte toia premunio , non pena.

Arb. Aggio tuorto , sgarraie ; ma mo sta mano
 Farrà da boia.

Ma. Semprezione mio ,
 Comme bello saie fà tira ca vene.
 Non boglio che lo boia
 Faccia a la mano toia chessa procura ;
 Isso mperzona stregnarrà lo chiappo ;

Accossì morarraie comm' a carogna ,
 Senz' avè manco n'ogna
 De guapparia.

Arb. Cana figliata ! Io faccio
 Comme vuoie: me ne torno ncremmenale.

Ma. Sienteme.

Arb. Che buoie dì?

Ma. Chesso non saccio.

Arb. Mannà ! tenisse ancora
 Na rommasuglia d'affecchienza ncore ?

Ma. Rossa me vuoie fa·fà comm' a lo fuoco?
 E bbattenne a mmalora ,
 No' m' affriggere cchiù !

Arb. Tu me vuoie bene ,
 E ppe me de piatà sso core abbampa.

Ma. Bene non è; ma vavattenne, e ccampa.

Arb. Tu vuoie ch' io sciat' ancora ;
 Ma si non m' amme , allora ,
 Gioia , me faie morì.

Ma. Che pena ! che taluorno !
 T' avasta , o no sto scuorno ?
 Cchiù non te pozzo di.

Arb. Sienteme.

Ma. No.

Arb. Ma sine...

Ma. Figlio , tu m' ammoine ;
 Lassame pe piatà.

A duie. Trombiniente senza fine,
 Squagliate, o no da cca?
 Si manco sso dolore
 Po fà schioppà no core,
 Qual auto lo po fà?

SCENA OTTAVA

Chiazza aparata pe la ncoronazione d'Artaserze. Trono da no pizzo co lo scettro, e la corona. Ara allummata mmiezo, co lo retratto de lo Sole.

Artaserze, e Artabbano, co na folla appriesso de sordate, e de puopolo.

Artas. Paiesane, e ssordate, a mme sentite.
 Io cchiù patre, che rre pe buie sarraggio.
 Vuie ncagno me sarrite
 Cchiù figlie, che bassalle.
 Lo sango e annore vuosto, e ttutto chello
 Che fusteve capace
 D'abbuscarve nfi a mmo, sia nguerra o mpacce,
 Beneditto ve sia de tutto core;
 Da mo ve lo prometto.
 Da tutte vuie mperò pe tant' ammore
 Io l'obbedienza, e federtate aspetto.
 E azzò ppe cchesso che ve dico, agnuno
 Dorma a quatto cuscine, e stia nsecuru,
 Co tutta l'arma mprubbeco lo ghiuro.
 *

Ar. Vecco cca lo becciero apparecchiato
Pe fà lo iuramento.

(E bive mo , ca nè sarraie contiento.)

Artas. *Sole bello , che puorte primmavera ,
E ffaie nascere , pascere , e mmorire ,
S' io dico la boscia , non cosa vera ,
Non te pozza vedè cchiù ncielo ascire :
Fa fenirme sti iuorne , oie o stasera ,
Comme s' acqua sta sciamma fa fenire :
E ssorchiannome neuorpo chisto vino ,
Addeventà pe nime pozza venino.*

SCENA NONA

Zemmira , e Dditte.

Ze. Mo va , curre , Artaserze , a rreparare.
Ntuorno Palazzo li rebelle stanno ,
E pe ciente cavalle vonno paglia.
E mmente agnuno accidere te vole ,
Quante , e quante pò dì male parole !

Artas. Cielo !

Ar. Chi so sti mpise tradeture ?

Artas. Prefè , sacc'io chi è stato , ed aggio tuorto.
Lo tradetore è Arbace.

Ze. Arbace è muorto.

Artas. Campa pe ppena mia , campa lo sgrato.
A l' obbreco mancanno

De figlio , io lo cacciaie da cremmenale.

Me spétta de cagliare , e non me lagno ,

Si me danno li Ddeie sso reto pasto.

Io che fice lo male, io me lo cchiagno.

Ar. No tremmate, Maistà; ccà sta Artabbano

Pe ccastecà sto figlio mmerdusiello.

Artas. Sì, corrimmo mo llà....

SCENA DECIMA

Mannana, e Dditte.

Ma. Ferma, fratiello.

Che notizie de truono io mo te porto!

Tutt'è fenuto a brenna.

Artas. E ccomm'è stato?

Ma. Li congiurate appriesso a Mmecampiso,

Comm'a ppecore appriesso a la campana,

S'evano nquatto botte mpossessate

De la loggia, che porta a lo salone;

Quanno, sentenno le ccampane ad arme,

Corrette Arbace mio sudato, e strutto.

Chi pò contarte tutto

Zò che fice pe tte chill'ommo d'oro?

Fice vedere, comme

Doie e ddoie fanno quatto,

Quant'era nfanme la penzata loro.

Decette ca la fede de vassalle

Ha da esse no raso senza macchie.

Confessà le facette senza corda,

Ca tu sì n'agnolillo, e nno ddeiavolo.

Mo a ccierte ngiuriava ,
 Mo a ccierte aute precava.
 Mo co cera de neve, e mmo de fuoco ,
 Non trovava maie luoco :
 E ssentive alluccarlo , o pparlà chiano ,
 Mo co boce de basso, e mmo soprano.
 Tutte votaieno faccia ; e rommaneva
 Mecampiso frabbutto comm' a cchillo,
 Che nnante cose , e da dereto taglia ;
 Ma Arbace a sto canaglia
 Assaporà le fice na stoccata ,
 E a lo Nfierno mannaie l'arma dannata.

Ar. (Figlio ntorcìa !)

Artas. Lo Cielo me spiraie
 De sarvarlo. Fuie donca Mecampiso
 Che sso carro portaie.

Ar. (Bello marrone !)

Artas. E Arbace non se vede ? E non se sape
 Addò canchero stace ?

SCENA URTEMA

Arbace , e Dditte.

Arb. Nnante a buie, Maistà, veccove Arbace.

Artas. Viene, e ddamme no vaso a ppizzechille,
 Ammico de sto core ; e ppo perdona
 Si pe ccuorvo pigliaie ssa palommella.
 E la nuozenzia toia comm' a telecrafo ,

Che parlare non sa, ma se fa ntennere.
 Fa che senza cchiù ntuppe io pozza darte
 Bonamano e bettura a ggenio mio.
 Leva mo ste vreccele
 Da ssi sciucche de neve; e ddince comme
 Mmano a tte se trovaie
 La sferra nsangonata;
 Pecchè fuiste; e all' addimmanne meie
 Non sapive resonnere no tecchete;
 E bolive parè mmecidiario.

Arb. Signò, s'io meretaie

La bona razia vosta,
 Lassateme stà zitto; e a cchill' ammico,
 Che ntra le botte e gguaie ve tenne a mmente,
 Fedateve, Maistà: songo nnozente.

Arlas. Iuralo a lo mmacaro: accossi stammo

Secure ch'è lo vero.
 Pigliate sto bicchiero;
 E azzò non puozze maie trovà pcleie,
 Chiamma pe ttestemmonio a sso contratto
 Chi meglio te garbizza ntra li Ddeie.

Arb. So lesto.

Ma. (È sarvo mo tunno de palla.)

Ar. (Che guaio! Si Arbace iura, se la sballa.)

Arb. Sole bello, che puorte primmavera,

E ffaie nascere, pascere, e mmorire,

Ar. (Scurò me!)

Arb. Si è boscia, non cosa vera,

Mo che ssorchio sto vino,

Addeventà pe mme...

Ar. Statte ! è benino.

Artas. Che ssento !

Arb. Oh Ddeie !

Artas. E te ne stive zitto ?

Ar. Pecchè a buie lo stipaie.

Artas. Tiene ss'arraggia.

Contr' a mme poverommo ?

Ar. M' aggio a llevà la maschera da facce ;

Ca l' ammore de padre m' ha traduto.

Sì , pe mme Serze fice a ccagno e scagno

Chisso munno co l' autro. A ttutte vuie

Gratisse io volea fà lo nzagnatore.

Arbace a cchessa corpa

Manco nsuonno traseva. Chella sfera

Sporca de sango appe da me , pe farne

Ciente frecole dinto a lo comune.

Chella facce de muorto che tenéva ,

Eva pecchè tremmava

Ch' io la coscienza , pe fà zò , m' aveva

Posta sott' a li piede : e steva zitto ,

Pe ssarvarme lo cuorio.

Ah ca s'isso non eva tanto buono ,

Io non tanto ammoruso ,

Arrevava a ssagli ncopp' a sso maio ,

Vc levava lo regno ,

E ppassà ve faceva l' urtemo guaio.

Arb. (Che conta !)

Artas. Anema porca !

A patremo tu daic na spata mpietto :
 Pe tte ncopp' a la vocca de lo stommeco
 Porto la morte de no frate : e a quante
 Azzuine che sorciere me fanno ,
 T' aie fatto strascenà pe no golio
 Accossì scellerato ?

Mo te faccio vedè si è bino o agresta.

Ar. Voglio primmo vedè chi resta resta.

Arb. (Cielo !)

Ar. Mo è tempo , amunice , de menarce
 Proprio a rrotta de cuollo.

Che mora sso teranno !

Arb. Gnore mio , che facite , attà d' aguanno !

Ar. Voglio morì da guappo.

Arb. O iettate la spata ,

O me vevo ssa bobba ndiavolata.

Ar. Tu che mmalora dice ?

Arb. Si Artaserze non campa ,

Io de la vita mia stuto la lampa.

Ar. E llassame azzardà ! te vuoie sta zitto ?

Arb. Non dico niente : quanto vevo schitto.

Ar. Ietta nterra ssa bobba , o figlio sgrato.

Confuso , desperato

Vuoie che pe tropp' ammore

Sia scannato no gnore ?

Voglio darte pe benta ssa partita :

Ietto la spata mia , lasso la vita.

Ma. Oh fede !

Zé. Oh trademiento !

Artas. Sordate , a sto momento

Secotate li reie , che stanno nfrotta

Fuienno comm' a ccierve ; ed Artabbano

Consegnate a lo boia ,

Che lo scarma , e ne faccia na fanoia.

Arb. Non movite no passo.

Signò , piatà , compassione.

Artas.

Ammico ,

Non te pozzo servire : lo sovierchio

Fa rompì lo copierchio. Io non confonno

Lo niro co lo ianco. Si tu vuoie

Sposà Mannana , io do lo benepraceto :

Sarrà Zemmira bella

De la Perzia , e de st' arma reggenella :

Ma si vuoie d' Artabbano lo perdono ,

Tc l' avviso da mo ; puoie levà suono.

Arb. Voglio puro levà suono a sta vita :

Che me iova , si p' esserve fedele ,

Si pe farve sto fuosso mo zompare ,

Aggio a bedere patremo scannare ?

Artas. Che vertù che me ncanta !

Arb.

Io n' adlimmanno

Piatà , gnernò ; voglio , Maistà , regore.

Voglio fare co tata a ccagno a bbita ,

Qua lupine salate a ccagno a ppezze :

A le ddenocchia voste

Chessa razia ve cerca chill' Arbace

Che ve fice scanzà na spata neuorpo.

Accossì ve levate lo golio